



Jadual Pembacaan Khutbah Jumaat

Siri 7/ 2023 (Bulan JULAI Tahun 2023)

Tarikh	Tajuk	Bil
7 Julai 2023M/ 18 Zulhijjah 1444H	Khutbah AADK: Dadah Dijauhi, Negara Harmoni	1.
14 Julai 2023M/ 25 Zulhijjah 1444H	Sempena Awal Muharram: Hijrah Nabi	2.
21 Julai 2023M/ 3 Muharram 1445H	Istighfar: Penyuci Diri	3.
28 Julai 2023M/ 10 Muharram 1445H	Isteri Amanah Suami, Usah Khianati	4.
Khutbah Kedua		

دبیایاء:



زكاة فولاو فينغ

دتریتکن:



جابتن حال إحوال اگام اسلام فولاو فينغ

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Istighfar: Penyuci Diri

21 Julai 2023M/ 3 Muharram 1445H

الْحَمْدُ لِلَّهِ غَافِرِ الذَّنْبِ، وَقَابِلِ التَّوْبِ، شَدِيدِ الْعِقَابِ، ذِي الطَّوْلِ لَا إِلَهَ إِلَّا هُوَ
إِلَيْهِ الْمَصِيرُ، أَحْمَدُهُ سُبْحَانَهُ وَأَشْكُرُهُ عَلَى عَطَائِهِ الْكَثِيرِ، وَأَسْتَغْفِرُهُ وَأَتُوبُ إِلَيْهِ
مِنَ الْخَطَا وَالْتَّفَصِيرِ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمُطَّلِعُ عَلَى مَكْنُونِ الضَّمِيرِ،
وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ الْهَادِيَ الْبَشِيرُ.

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ وَعَلَى آلِهِ وَصَحْبِهِ، أَهْلِ الْجِدِّ
وَالنَّشْمِيرِ.

أَمَّا بَعْدُ، فَاتَّقُوا اللَّهَ- تَعَالَى- وَأَطِيعُوهُ فَقَدْ فَازَ مَنْ اتَّقَاهُ.

MUSLIMIN YANG DIRAHMATI ALLAH SEKALIAN,

Saya berpesan terutamanya kepada diri sendiri dan sidang jemaah
sekalian, bersama-samalah kita meningkatkan ketakwaan kepada Allah
سُبْحَانَهُ وَتَعَالَى dengan melaksanakan segala perintah-Nya dan
meninggalkan segala larangan-Nya. Semoga ketakwaan itu akan
membentuk kita menjadi insan soleh dan mulia dalam kehidupan dunia,
sebagai tempat persinggahan menuju destinasi akhirat.

Selain itu, elakkan dari bermain gajet, melayan media sosial seperti
Whatsapp, Facebook, Instagram dan lain-lain, tidur dengan sengaja dan
menggerakkan tabung masjid ketika mendengar khutbah. Semua ini



boleh mencatatkan pahala dan termasuk dalam perbuatan sia-sia. Marilah kita bersama-sama memberi perhatian kepada khutbah Jumaat pada minggu ini yang akan mengangkat tajuk: **“Istighfar: Penyuci Diri.”**

MUSLIMIN YANG DIRAHMATI ALLAH SEKALIAN,

Hari berganti hari, tahun berganti tahun. Setiap saat usia kita makin meningkat. Persoalannya, adakah dengan peningkatan usia kita ini, amalan kita turut meningkat? Kehidupan di dunia hanyalah sementara, kehidupan di akhirat jualah yang kekal untuk selama-lamanya. Oleh itu, marilah kita bersedia dari sekarang, dengan memperbanyakkan amal ibadah bagi mencapai kebahagiaan di dunia dan di akhirat. Firman Allah **سُبْحَانَهُ وَتَعَالَى** dalam surah Al-Hasyr ayat 18:

يَا أَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ وَاتَّقُوا اللَّهَ إِنَّ اللَّهَ خَبِيرٌ بِمَا تَعْمَلُونَ ﴿١٨﴾

Maksudnya: *“Wahai orang-orang yang beriman! Bertakwalah kepada Allah (dengan mengerjakan suruhan-Nya dan meninggalkan larangan-Nya); dan hendaklah tiap-tiap diri melihat dan memerhatikan apa yang ia telah disediakan (dari amal-amalnya) untuk hari esok (Hari Akhirat). Dan (sekali lagi diingatkan) bertakwalah kepada Allah, sesungguhnya Allah amat meliputi pengetahuan-Nya akan segala yang kamu kerjakan.”*

HADIRIN YANG DIKASIHI SEKALIAN,

Kita sebagai manusia, tidak terlepas dari melakukan dosa dan hanyut dengan godaan dunia. Mutakhir ini, lambakan hiburan yang melalaikan dapat diakses melalui pelbagai media. Kita yang bermusafir di dunia ini, perlu terus sabar dan kuat menghadapi ujian tersebut. Jatuhnya

kita ke lembah kemaksiatan itu, memerlukan kita membersihkan diri darinya.

Justeru, Islam telah mengajar kita beberapa langkah untuk membersihkan jiwa iaitu dengan membanyakkan zikir dan istighfar. Kita seringkali berasa sukar untuk mendekatkan diri kepada Allah, kerana banyaknya maksiat dan kemungkaran yang telah kita lakukan. Oleh itu, kembalilah kepada Allah dengan perbanyakkan taubat dan istighfar, supaya hati, jiwa dan akal kita tunduk kembali kepada Allah. Allah berfirman dalam surah Ghafir ayat 55:

فَاصْبِرْ إِنَّ وَعْدَ اللَّهِ حَقٌّ وَاسْتَغْفِرْ لِذَنْبِكَ وَسَبِّحْ بِحَمْدِ رَبِّكَ بِالْعَشِيِّ وَالْإِبْكَرِ ﴿٥٥﴾

Maksudnya: “Maka bersabarlah kamu, kerana sesungguhnya janji Allah itu benar dan pohonlah ampun bagi salah silapmu, serta bertasbihlah dengan memuji Tuhanmu pada waktu pagi dan petang.”

JEMAAH YANG DIRAHMATI SEKALIAN,

Terdapat pelbagai kelebihan istighfar. Antaranya ialah:

Pertama: Allah mengasihi hamba-Nya yang sentiasa bertaubat sebagai salah satu cara untuk membersihkan diri daripada dosa seperti yang disebut dalam surah Al-Baqarah ayat 222:

.... إِنَّ اللَّهَ يُحِبُّ التَّوَّابِينَ وَيُحِبُّ الْمُتَطَهِّرِينَ ﴿٢٢٢﴾

Maksudnya: “Sesungguhnya Allah mengasihi orang-orang yang banyak bertaubat, dan mengasihi orang-orang yang sentiasa mensucikan diri.”

Kedua: Mencontohi amalan Rasulullah ﷺ. Hal ini disebutkan dalam hadis daripada Abu Hurairah رَضِيَ اللَّهُ عَنْهُ, bahawa beliau mendengar Rasulullah bersabda:

وَاللَّهِ إِنِّي لَأَسْتَغْفِرُ اللَّهَ وَأَتُوبُ إِلَيْهِ فِي الْيَوْمِ أَكْثَرَ مِنْ سَبْعِينَ مَرَّةً

Maksudnya: “Demi Allah, sesungguhnya aku beristighfar kepada Allah dan memohon ampun kepada-Nya setiap hari lebih daripada 70 kali.”

﴿Hadis Riwayat Al Bukhari﴾

Ketiga: Seorang hamba yang sentiasa bertaubat dan menyesali atas segala dosanya dijanjikan ganjaran syurga. Firmannya dalam surah At-Tahrim ayat 8:

يَا أَيُّهَا الَّذِينَ ءَامَنُوا تُوبُوا إِلَى اللَّهِ تَوْبَةً نَّصُوحًا عَسَىٰ رَبُّكُمْ أَن يُكَفِّرَ عَنْكُمُ
سَيِّئَاتِكُمْ وَيُدْخِلَكُم جَنَّاتٍ تَجْرِي مِن تَحْتِهَا الْأَنْهَارُ ... ﴿٨﴾

Maksudnya: “Wahai orang yang beriman! Bertaubatlah kamu kepada Allah dengan taubat nasuha, mudah-mudahan Tuhan kamu akan menghapuskan kesalahan-kesalahan kamu dan memasukkan kamu ke dalam syurga yang mengalir di bawahnya beberapa sungai....”

JEMAAH YANG DIKASIHI SEKALIAN,

Khatib ingin berkongsi beberapa lafaz yang disarankan untuk diamalkan, antaranya ialah:

Pertama: Membaca '**Astaghfirullah**' yang bermaksud "Aku memohon ampun kepada Allah". Amalkanlah ia sekurang-kurangnya tiga kali selepas setiap kali solat fardu. Inilah semudah-mudah istighfar

Kedua: Membaca **Istighfar** yang sempurna iaitu:

أَسْتَغْفِرُ اللَّهَ الَّذِي لَا إِلَهَ إِلَّا هُوَ الْحَيُّ الْقَيُّومُ وَأَتُوبُ إِلَيْهِ

Maksudnya: "Aku memohon ampun kepada Allah, tiada Tuhan kecuali Dia, yang tetap hidup dan kekal dan aku bertaubat kepada-Nya"

Ketiga: Membaca doa berikut:

رَبِّ اغْفِرْ لِي وَلِوَالِدَيَّ وَارْحَمْهُمَا كَمَا رَبَّيَانِي صَغِيرًا

Maksudnya: "Wahai Tuhanku, ampunilah dosaku dan (dosa) kedua orang tuaku. Sayangilah keduanya sebagaimana keduanya menyayangiku di waktu aku kecil."

Keempat: Amalkan membaca doa dari Surah Al-Aa'raf ayat 23:

...رَبَّنَا ظَلَمْنَا أَنْفُسَنَا وَإِنْ لَّمْ تَغْفِرْ لَنَا وَتَرْحَمْنَا لَنَكُونَنَّ مِنَ الْخَاسِرِينَ ﴿٢٣﴾

Maksudnya: "Wahai Tuhan kami, kami telah menganiayai diri kami sendiri, dan jika Engkau tidak mengampunkan kami dan memberi rahmat kepada kami, nescaya menjadilah kami daripada orang-orang yang rugi."

MUSLIMIN YANG DIRAHMATI SEKALIAN,

Kesimpulannya, amalan taubat dan istighfar ini bukan hanya perlu dilakukan oleh orang yang berdosa dan berbuat kesilapan sahaja tetapi ia perlu diamalkan oleh setiap orang.



Mungkin ramai di antara kita sering berkata pada diri sendiri, “Aku sukar hendak mendekatkan diri kepada Allah, sebab aku pendosa, namun ingatlah bahawa sekalipun dosa yang dilakukan seluas alam, janganlah berputus asa dari rahmat Allah.” Allah telah berfirman dalam surah Az-Zumar ayat 53:

قُلْ يَاعِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ

جَمِيعًا إِنَّهُ هُوَ الْغَفُورُ الرَّحِيمُ ﴿٥٣﴾

Maksudnya: “Katakanlah (wahai Muhammad): “Wahai hamba-hambaku yang telah melampaui batas terhadap diri mereka sendiri (dengan perbuatan-perbuatan maksiat), janganlah kamu berputus asa dari rahmat Allah kerana sesungguhnya Allah mengampunkan segala dosa; sesungguhnya Dia lah jua yang Maha Pengampun, lagi Maha Mengasihani.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Julai

(Bagi Bacaan pada 21 Julai 2023 bertemakan “Kekeluargaan”)

2023M/ 14445H

الْحَمْدُ لِلَّهِ عَلَى آلائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Di kesempatan ini, khatib ingin menyatakan tentang “Malaysia Madani”, antaranya berkaitan pembinaan sesebuah keluarga iaitu sebuah institusi penting yang merupakan komponen asas kepada pembentukan masyarakat. Dalam hal ini Islam sebenarnya telah



mengajar kita betapa semangat kekeluargaan itu perlu diberikan perhatian. Baginda Rasulullah ﷺ bersabda yang bermaksud:

“Sebaik-baik kamu adalah yang paling baik terhadap ahli keluarga dan aku adalah yang paling baik dalam kalangan kamu terhadap ahli keluarga ku.” (Hadis Riwayat Ibnu Majah).

Al-Quran turut menekankan konsep persaudaraan, tolong-menolong, memperbaiki hubungan sesama manusia dan larangan berpecah-belah, melalui firman-Nya dalam Surah Ali Imran ayat 103 yang bermaksud:

“Dan berpegang teguhlah kamu semua pada tali Allah (agama Islam), dan janganlah kamu berpecah belah, dan ingatlah nikmat Allah kepada kamu ketika kamu bermusuhan (semasa jahiliah dahulu) lalu, Allah menyatukan hati kamu (sehingga kamu bersatu padu dengan nikmat Islam) maka menjadilah kamu dengan nikmat-Nya itu orang Islam yang bersaudara dan (dahulu) kamu berada di tepi jurang neraka (disebabkan kekufuran kamu semasa jahiliah). Lalu, Allah menyelamatkan kamu daripada neraka itu (disebabkan nikmat Islam juga). Demikianlah Allah menjelaskan ayat-Nya kepada kamu supaya kamu mendapat hidayah petunjuk”.

Mimbar menyeru sidang jemaah sekalian agar berusaha menyemai nilai **KASIH** dalam kehidupan seharian. Kasih sayang, **Akhlak** mulia, **Sihat** dan selamat, ber**Ilmu** dan **Harmoni** adalah asas kebahagiaan sesebuah keluarga. Semoga keluarga yang dibina, berjaya menghidupkan persekitaran yang baik dan harmoni serta melimpahkan keberkatan kepada masyarakat dan negara.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ، اللَّهُمَّ آمِنًا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ
أُمُورِنَا.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Al-Sultan Abdullah Ri'ayatuddin Al-Mustafa Billah Shah Ibni
Almarhum Sultan Haji Ahmad Shah Al-Musta'in Billah dan Kebawah
Duli Yang Maha Mulia Seri Paduka Baginda Raja Permaisuri Agong,
Tunku Azizah Aminah Maimunah Iskandariah Binti Almarhum Al-
Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul
Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْعَلَاءَ وَالرِّيَاءَ، وَالرَّبَا وَالرَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat

menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠١﴾ فَادْكُرُوا اللَّهَ الْجَلِيلَ يَذْكُرْكُمْ،
وَاشْكُرُوا عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٠٢﴾